

燕石集卷第十二

記

都水監改修慶豐石碑記

碑於字為閉城門具或日以板有所蔽近代水工用之以時畜
洩水行船世祖皇帝至元二十九年可昭文館大學士知太史
院領都水監事臣郭守敬圖水為渠曰通惠河貫京城迤邐出
南水門過通州抵高麗莊之壩為里二百視地形創碑附崖壁
及底皆用水凡二十四慶豐其一也後二十年當至大四年諸
牘浸腐宰相請以石易為萬世利且請度緩急後先作則工不
追工不迫則周且周仁廟勅準有司以次第舉由是至順元年



始及慶豐之後都水少監主溫臣率其屬分督程作日役士卒
及土木金石之工千有五百五十輸木萬章鐵以鈞計凡八百
有奇石村三千一百甃甃灰藁他物無筭築基縱長百有二十
尺三分長之二為衡廣高二丈間容二丈二尺經始於是年三
月之望粵六月十有五日告成絕築中度完好緻密公私善之
明年春監丞阿禮張宗顏狀是役之為日久近牌之高深長廣
幾何靡費物如干創始改作之緒庀工之勤成功之利之美求
識以文予復之曰世祖開物成務群策畢舉仁廟克承先烈措
注宏遠功不百倍不改作也臣下奉行惟謹事理之著者也記
是誠宜然予疑是牌之始命名為何人與創始之歲果豐與歎
或示微意於後世歟惜莫可得而知何也牌非侈靡游觀之所
國計民庸仰以給者猶必待歲豐而後作矧他役乎斯果作於
豐年則是役不敢妄興民不敢苟勞財不敢徒用章之矣因其
役并原其名是為記

平江天妃廟題名記

至順四年七月廿四日皇帝在上都御大洪禧殿丞相臣奏海
道都漕運萬戶府歲以舟若干艘轉輸東南民租三百萬石有
奇由海不旬日達京師者幾數十年颶風不作斥冥頑不靈之
物以避皆護國庇民廣濟福惠明著天妃之力國有恒典歲遣
使致祭報神今中書省遣斷事官臣床兀兒乘遞以聞伏請進

止匕可其奏頌問左右神居何方或以東南對上持香致敬其方授臣床兀兒偕翰林修撰臣襲奉命代祀迺八月十七日啓行九月八日昧爽率漕運臣薩德彌實等行禮竣事僚佐請遵故常石刻祝辭及與祭諸臣姓名祠下屬筆臣襲噫齋祓以祀神臣床兀兒臣襲職也捧香致祝辭勞何有烏嗣服之君蒞政之始所以為民食報神之意則不敢不書其萬一以厲臣下云若夫頌問之旨則臣床兀兒之所白奉者也至順四年九月既望翰林修撰承真郎同知制誥燕國史院編修官臣宋襲謹序

偃師縣尹趙君遺愛記

致和戊辰維秋九月文皇繼統改元天曆陝西諸兵承命上都過關東馳倖剽荼毒河南屬邑有曰偃師實直其衝罹患百倍民歲旱飢死徒無所睢人趙侯昉宰是邑侯性豈弟庶恪到敏報稱是圖竭蹙民庸綏輯孔寧撫字篤至明年荐旱府檄且下徵歲所供烏羽獸毛鹿修石蜜凡若干事祈免再三府大震怒侯即抗言天子有詔兵荒郡邑蠲賦一年常賦且然矧是微物以小廢大理害仁一切復除庶安赤子其或不然移徵樂土又曰是邑地居岡坂時雨時暘畝收猶薄早暵五載莫甚今歲來牟槁死秋種不入貧富餓莩疇過疇甦西兵之來屯戢閱月劫掠桎搜捕巖谷服食孳畜掃蕩靡遺賑恤莫繼租賦安出不大布惠瘡痍曷瘳蠲賦數年始可還定圭田既荒吏稍亦

鮮侯又申請權宜規措官給粟米吏增料錢計非私已庶免腹
剝侯寧惠民且及于兵之實邑民屯戍南北歲方存凶兵民均
貧兵符卒徵何以應命侯援故常建言宥宥一歲之中停免調
集凡是數端疊至論朝廷悅遂功大利博始民轉徙侯大
勸諭說留止殆什三四走持告身告飢請賑于府于省感動上
官從請發廩倍他屬邑給予絕弊不虛惠澤侯深慮患復有
一則民人流亡家產故在群不逞徒乘間抵隙竊毀什器冒貸
田廬盜伐桑柘槐榆棗粟民幸來歸無依何辜迺質畜夫鄰里
保甲理論法繩視如己物樂歲民歸不怨以憾邑解兵燬無所
出治侯命創為不病其民大為飯羹以來餓夫基構斷塗室完

民飽僚吏同休庖庫具興匪務觀美亦裨荒政侯趨府中公事
謁守貳僚案禮敬飲食才侯匪他令比解民倒懸燠寒飢
飢民父母之感恩再造若張恭者為輩數百託于太常韓君方
平：來京師屬筆吏聚巧文刻石用報德侯平亦邑人目擊侯
政謂侯之美述一漏百獲一言焉昭示後來子侯同年固知侯
者泰定甲子侯登乙科貳守鈞州政亦可書再命是邑緒懋且
超終更之歲至順壬申鉅金五年繼嘗遷秩司刑遼西府曰廣
寧用御史薦改尹安陽甚名時敏字則可學云

山南察院題名記

世祖皇帝平定海寓立御史臺畫天下為二十二道置提刑按

察司後易名曰肅政廉訪內郡凡八道隸御史臺山南其一也廉訪寔視古刺史職每道便二治理所副以下率冬夏巡行郡縣察奸黠貪治獄寬濫愈民瘼按章程檢吏贖鈎較其乖違急弛而罪之民病不病視守令守令治不治視廉訪賢否其職重故其人難列聖恒下璽書獎諭戒飭猶慮未至歲定為故常遣監察御史員分按各道曰體覆聲蹟示勸懲也廉訪以御史至無所視事率別稱公守為行院至元四年冬予備位六察分按山南憲長圖魯公洎僚案合辭謂公署題名近代盛典御史至行院未有紀載故沂求歷年姓名又不可得斷自至元三年將勒于石而未有文敢請迺為之言曰天子命御史

大夫擇御史分按各道立經陳紀宏遠固密莢以加矣臣下敢怠於奉行哉願用人何如爾若褻之竊祿者將為石崖夫聞諸道路為聲見於事為蹟已德不明而妄黜陟人可乎烏虜右人有言曰以身教者從以言教者訟傳曰物有本末事有終始知所先後則近道矣聲蹟云乎哉予嘉圖魯公洎僚案之賢而能導盛典故以是告是年十二月朔奉直大夫宋襲記

荆湖北道宣慰使司杞梓堂題名記

世祖皇帝一天下楚武定王阿力海涯下江陵捷奏大喜燕三日置荆湖行省旋廢以地重控制置宣慰司即勝國制閫為理所前堂曰宣化初於大德乙巳北為步二十舊有堂扁杞梓

宋帥臣孟珙作於淳祐間世異傾圮殆盡使完者帖木兒懲前
政簡怠曰盍新之請于河南行省得經費若干緡改為於後至
元四年戊寅大歲規制克稱威令亢爽嚴邃藩翰稱省既落成
為聽政恒所宣布燕享則始臨前堂六年冬西夏買諾由大鴻
臚出鎮閱月謂其同朝曩視事宣化當樹石紀同列姓名今
屋此而石彼有乖目擊道存之義遂謀更鐫相率來請文為
之言曰慶賞刑威國之大柄史氏以直筆誅姦諛發潛德是
文字紀載亦能佐賞刑萬一近代寺署列刻察宋昭示當世使
人目具姓名美刺不已其勸懲之功較之史氏之於身後似畧
而實切然臣也不賢革袞斧鑕不足榮辱之臣也賢惕而懼慨
然而慕於忠詐回直石之功顧淺耶昔予過汴見宋進士及開
封府題名碑溫國文正公龍圖李肅公名下觀者指石成痕階
寸許以彼立國三百年名臣亦夥唯曰司馬家包家名不可以
徒得信夫訥之微意深矣茲不可不書完居位五年入為兵部
尚書政簡民安訥之考亦只兒鬼大德間嘗假相銜為使位終
丞轄訥端嚴周慎克世濟其美同知司事例刺沙質直敦樸副
阿習海涯武定諸子隱谷忽北庭右族參佐率能事協和皆靖
恭而善為治殆克仰體前聖倚注之深罄竭心力於修捍旬宣
不待刑賞為勸懲張本者是可喜也詩曰上帝臨汝毋貳爾心
毋或曰盡瘁以仕寧莫我有庶以厲左方來者而企夫文正孝

肅之遺踵云完字伯堅訥字元方至正元年月日宋襲撰

吏部主事廳題名記

吏部左成周為天官冢宰迨後世謂之選曹世祖皇帝定官制六部設幕官曰主事寔右議郎職視各部事繁簡為員多寡吏部設主事員三其曹局職掌無春官司馬簡靜之優視版曹考工若稍逸然選任黜陟擇百工理人釐務大非金穀營繕所可儕數類其生殺予奪陽舒陰慘之任若與大司寇對待而立切要之柄有甚重焉者員雖三其一則四時逆妨職掌考功磨勘是專主案牘實為員二賀幸上京一員分曹扈從則獨署者又居一歲之半畫諾贊佐調齊均平人法並用使事物各得其理

其心不曰勞矣乎任重心勞固其宜也為貪墨曲徇為刻削矯激者懼邦憲違官箴干物議為正大平允為清通簡要者道行名立華顯臺閣直理欵義利之分耳可不慎歟長安趙允升由進士出官辟椽中書西曹擢任是職蓋勞心而稱其重任者初視事將沂求前政姓名題石以敬歷未久故皆畧始自至正元年書之微記于予敢以慎之、幾告繼至者嗚乎世降俗漓心不相孚遂信耳目信簿書良法具矣如美意何將有瓌偉特達之士乘時變遷以求合乎右道不可謂秦無人焉至正二年七月翰林待制宋襲記

太平橋記

表之萬載縣太平里大道西達湖湘東出閩浙有溪流其中歲
淋潦泛濫方舟而渡徒跣者涉公私病焉里中民故新昌貳守
教君導晦家故富饒廼損財斥徒樹石墩作橋凡若干步屋于
上凡若干楹木石載雄藻繪實鹿鑿石甃道凡五十里王官
佑容疾馳健步旁午欣悅利博惠久初作於至正元年三月其
九秋落成後五年遣介謁記予惟國家武定南服無橫徵暴
歛所以安養涵煦其民亦以至矣由其上世攻苦食淡斲作
勞晝操籌而夜枕鎗銖積寸累困衍箱溢往之田連阡陌富擬
封君迨其子孫輿服僭侈驕奢不法好閱健訟殘折奴佃支體
甚者殺人而火其廬不蕩其貲產隕身滅族不已也史傳白圭

倚頓殆不若是或以貲為郎入粟補官志不過夸里閨驕妻妾
而已教君獨能利物濟人以助公家之不給又聞其能做古人
置義田作橋曰良溪鎮江錦江東潭西潭紹溪昌江仙居者凡
十餘所其殆積而能散者視予前所云者不曰賢矣乎彼能慕
教君之行是則是傲則予是文之功亦豈淺哉至正五年四月
翰林直學士亞中大夫知制誥同修國史兼經筵官宋瑩記

翰林國史分院題名記

題名記者翰林分院官紀名氏也至正五年四月廿有五日天
子乘輿至上都從幸者則承旨不荅實理學士完者帖木爾直
學士完者不花及製經歷兼經筵參贊官塔海帖木爾也侍制

則凌懋翁修撰張士堅應奉文字僕石寮遜編脩官鉅出舉臺也承旨則自至大間長院出而復入距今垂四十年不能悉舉其所之歲而學士及經歷雖嘗以宿衛扈蹕其官翰林分院則自是歲始也聚以泰定甲子叨科第待制由太學生釋褐修撰以下新進士三人皆今一至者也嗚呼職位之清華責任之重大固不異前記日報稱曰禮遇不能無愧烏允吾數人者繼此以往或數至烏或不復入院徙他官而至烏斯文所繫者未可知姑以識歲月也院屬七人則需次典籍官辟為掾者任希說譯史月魯不花通事脫輝知印刺馬班蒙古書寫尚都不花接手寫史暉典書傅良臣也乘傳來奏捧香酒祀三朝御容暫至而即歸者則應奉孫擴也經筵附見者九十有四人以奉職兼譯文官則宣文閣鑿書畫博士承直郎周伯琦授經郎儒林郎達理麻失理奉議大夫王時可餘則檢討鄭畋馮本譯史安童完者帖本兒達理麻失理書寫王可道宋誼蒙古書寫王也先宣使札八吳鑄牛嘉也七月望日翰林直學士亞中大夫知制誥同脩國史兼經筵官宋聚記

上都分省左司掾題名記

天朝幅員倍前代庶事之繁亦然中書為天下政本悉綜理裁決之相府受其成宰士提其綱至于究物理審事情折衷以道參酌以典章據案具牘與奪輕重則皆屬之曹掾焉近制選

辟各半成精其技能往。練達老成由是敬歷臺閣致位卿相
東曹職掌視右司重為設掾之數亦倍之天子歲幸上都則曹
十人從宰相治分省事或以為簡而優者是。大不然蓋天下
之政由大都達之分省或可或否奏白行遣止付之十人顧不
尤重且勞哉故其將歸也咸誌其名氏于壁以為榮乘輿往
則內擇二人聽命於行在次舍謂之隨駕無逆旅室廬之安具
帳纒自隨而野處允汲爨寢輿秣飼馬乘舉不得便適饑食
渴飲不時蒙犯風霰霜露馳突泥淖塵氣中其苦又不可言故
併書以慰之於壁記之末是歲分省者九人虎理翰仲桓木八
刺沙居仁達理馬寔可行速魯蠻希賢鄭志道士寧華彥方
景元李思義仲得郭德修從道李冲霄鵬舉隨駕者速華郭李
不至而物故者一人崔克敬允恭至正五年七月廿又七日宋
聚記

司農司題名記

至正五年冬十一月十有七日皇帝御明仁殿大司農臣啟柱
卿臣韓元善奏司農之設爰自世祖列聖相承條制悉舉唯是
刻石題志諸臣之名猶未有文謹昧死請上嘉之勅翰林臣聚
為記臣不文敢不欽承明命欽惟世祖皇帝以 聖之資中身
受命奮勞于外知稼穡為治天下之本迺至元七年立大司農
司秩正二品官五人曰大司農曰卿少卿丞農正主農務鄉校

水利此肇端也十八年改農政院二十年更名務農司秩降三等尋改為司農寺後二年復為大司農秩如七年時又明年內郡設巡行勸農司為道凡六廿又七年罷併歸提刑按察司兼掌其事後改肅政廉訪亦如之守令以無勸農事結銜廉訪總其綱歲報政於司農以第殿最迄今遵之迨仁宗朝承平日久家給人足國用富饒天子益重其事陞秩從一以褒崇之定為大司農五人卿二人少卿二人丞二人幕寮經歷一人都事二人照磨一人管勾一人其屬則若屯田之府供饌之司藉田為署營田設官輯要有書樹藝有法凡所以成功者于茲備焉皇上厲精求治宵旰憂民慮農政之寢地思作新之至正四年命樞密知院臣巖柱為大司農眷注維篤獎訓載嚴且擇僚佐以副之諸臣蒞事維謹嘗相諗曰吾輩荷國寵榮尚益思振厲厥職裨贊盛治然事由人立人以功顯不有紀載曷示勸懲故有是請既得旨則以官制之定始于皇慶二年前乎是者著于簡牘後是者錄于石焉臣聞古之人有言曰克舜其君克舜其民蓋臣道之能事也昔大禹陳謨于舜曰九功惟叙九叙惟歌戒之用休董之用威勸之以九敘俾勿壞夫水木土穀之修正德厚生之和司農之職九功有其六矣戒之董之之道其璽書訓勅賞罰勤惰之謂勸勸之俾勿壞者殆類是石刻之昭示悠久也比歲不登中土艱食繼自今膺是選者精白一心恪慎乃職

修六府而治三事使民衣帛食肉不飢不寒則是克舜其君克
舜其民之義也告之司農孰曰不宜或由是而有所儆焉庶幾
乎祖述禹稷萬分之一以上佐聖天子垂無窮之休亦有無窮
之聞矣謹以是題于端而列諸臣名氏其下至正六年歲在丙
戌正月日記

序

同年小集詩序

詩一首見第五卷

天曆三年二月八日同年諸生謁座主執政蔡公于崇基萬壽
宮寓所既退小集前太常博士藝林使王守誠之秋水軒坐席
尚齒酒肴簡潔談咏孔洽探策賦詩右榜則前許州判官魯
不華前沂州同知曲出前大司農照磨諳篤樂奎章閣學士院
參書雅琥左榜則前翰林編修王瓚前翰林修撰張益前富州
判官章毅翰林應奉張彛編修程謙疾不赴者前陳州同知納
臣深州同知王理太常太祝成昂時奧魯調官監濠之懷遠縣
曲出監慶元之定海縣毅廣東元帥府都事皆將赴上琥即雅
古蓋御更今名云執筆識歲月者前翰林編修詹事院照磨宋
襲也

宋氏七子名字序

至元丁丑春齊人宋紹明子達由西南兩行臺御史召拜內臺
監察御史與余居相近而未始相識夏六月予備位六察與之

聯事以同宗固相好也久之懼予曰吾子若諸弟之子凡七未
有名字君吾同宗命名與字演其義以勗之宜莫君若予惟吾
宋姓由商微子八周封國所得遂取為類而命之名示不敢
忘所自出子達三子字微文從字從善循字循理子正三子
微字微言得字得一律字律已子澄一子噫宗子法廢復字復
禮士大夫家往鮮有譜牒然吾宗均微子之裔非若他氏族
其所自出有不同者七子苟能達蘊明允族譜引之意篤於人
倫烏則庶不負予以類命名之深意矣時至元戊寅春二月子
達出為燕南道憲副宗人聚序以貽之

祖道集序

夫德壬寅予生九齡侍先府君篋庫江陵延祐己未始克還京
泰定甲子忝預科名累試館閣聲聞過情至元乙卯叨被寵榮
由御史遷持憲于荆公卿賦詩光華其行黼黻為章韶鈞為
聲刻梓流布式昭文明是歲秋暮月魄哉生薊丘宋聚自叙可徵

送黃君美序

至元五年予備位山南臬司分治邛復曹屬三人從行其一黃
君美性闡朗易直有才諳律已嚴治文書綜核精詳不事苛撓
尤長獄事聽斷察而不刻立心坦夷若非業吏者明年秋選貢
掾六官蓋國家割治體要置肅政廉訪司按察郡縣視右司隸
刺史職專任重掾亦如之勢然也天下凡廿又二道設掾十

六人參用儒吏擇廉慎通敏者掾六官暨察院歲僅二人既陞朝往、躋華顯位丞弼亦榮幸矣哉由西南二行臺所隸各道以進者為資格又迂緩唯內郡八道隸中臺與選貢為速化其開枯於資稟若習氣之但豪悍深削挾知術擅威福敗德隳事萬一致物議之云、則又不得廁名列亦唯艱哉君美行衆咸歌詩以贈予告之曰孔子曰不患無位患所以立不患莫己知求為可知也六官之司曹局甚夥天下之事寔準則焉裁決措置其當否基於一掾之口君美知所以立舉足患視一掾難而易上官臆見不齊怨隙交惡甲是乙非詼、口語調和將順使人情不乖戾事、當理視一掾易而難勗哉君美幼知讀

書長觀光京師受御史牒麓補吏濟寧再麓補掾淮西憲遂遷山南處速化之地向所謂物議之云、者未嘗及其身由是而履前轍所底之可榮幸者執左契然足可稱願也聞其上世以鄉里數被河患多藁殞者是行也市杉栢材以歸治棺槨將舉十餘喪將塋之此其行又可書君美名秉彛謀郡人後至元庚辰八月奉直大夫僉司事廣陽宋聚

孫母九十詩序

世言壽微者曰氣血之稟也曰彼水土宜壽飲其水食其土所產致然也曰仁者壽也曰陰德也曰勤儉以得之也由氣血水土天也人為者仁陰德勤儉也憲掾孫允暉母夫人馬氏年九

十就養于荆聰明康強其壽徵于所稟若飲食若陰德舉莫
可知婦職助祭祀主中饋循壺儀宜若無事功可暴白其仁與
勤儉者蓋允暉始為保定人考某君以其年徙居亳夫卒時年
若干夫家素清苦無田園之入金帛之畜食啖厲其家人事蚕
桑織紵為衣食資教子樹讀書遂致身風紀跡是則次與勤
儉享上壽非幸也宜也何也昔者魯大夫公父文伯退朝見母
方績曰以斂之家而主猶績乎其母訓有曰民勞則思之則善
心生勞非勤儉善心非仁與夫人之行敬姜之辭也誠哉夫
人之壽宜也非幸也象歌詩以為壽夫奚疑然魯子養曾哲養
志魯元養曾子養口禮禮曰將為善思貽父母令名必果養志
貽令名稱副夫人之壽吾深有望于允暉若耳昔滌灑之奉承
言怡色之禮夫人能行之年月日宋襲序

志勤齋序 有詩

燕人楊元卿由其外父單周臣為予婦翁確齋劉先生母黨尊
丈遂相知今二十年周臣為帶下 有聲京師所與交皆中原
耆舊名公卿才大夫士元卿幼孤弱冠時周臣喜其能卓然自
樹立納為贅壻盡以其術教之元卿持心堅用力不怠汲汲焉
期其業之成有不遑暇食者周臣歿克世其業且嗜讀書臨帖
久之用太常麓諸天官氏執籩豆之投於宗廟郊社習禮樂名
物度數每事無不問蓋求效其職以獲譽而進者是役書滿廁

流內銓秩第九品指紳子往。有自此躋華貫嘗取志勤顏居
室以自勗其學遂求說焉古人有言曰有志者事竟成天下古
今事無鉅細其成也率基于志。立則勤隨之事功迺集焉聖
人責宰予晝寢志氣昏惰教無所施也為警枕為錐刺股手不
停披口不絕吟始曰志勤哉噫元卿之為學當視醫仗視筮任
則勤可以成其志矣奚其難抑今之志勤者富貴之謂也學云
乎哉敢以是為說而系以詩 萬里橋邊江水長貴人駟馬晝
生光是誰能識詩書味長白山頭羹粥香螢囊雪案度青年
珍重夫君亦自賢鞍馬歸來成內媿眼花頭白枕書眠

贈慈化寺僧愈上

宜春南泉山大慈化寺普庵禪師自宋孝宗乾道間示寂由能
陰佐民物累贈謚曰寂感妙濟真覺昭貺表其所藏之塔曰定
光聖元版圖混一大江之南允民值水旱疾疫禱于師輒應尤
崇敬之成廟時守臣上其靈蹟加謚大德仁宗延祐間再加師
號曰慧慶塔名曰靈瑞仍命詞臣文其碑石以褒美之德至渥
也自勝國迄我朝贈謚為字凡十有二所以稱頌其盛德妙行
亦已極矣至元五年冰溪張熙祖守袁以師之能福是郡而報
稱猶若有所未至乃援禦災捍患之典載請于朝住山僧妙愈
擇其徒之能幹盡者曰普沾資遣詣京師致其牘于宣政院達
于帝師迺至正四年夏四月事聞制加古佛以冠前謚贈扁曰

大護國慈化禪寺中宮聞之亦錫纓絡寶幡以革其供仍以金
欄袈裟被于愈身明年冬沾南歸朝之顯者咸嘉愈克副邦侯
奏請之意善於擇人得沾之才上下兩都五閱寒暑竭蹶奔走
跋涉艱苦晨夕懇謁以遂其志宜為歌詩以賀有成烏嗚呼由
師至愈踰二百年十有餘傳矣世稱其靈彌著故尊信之者彌
甚張侯之心及愈之志不待耆蔡可以遂計其必醅也是惟無
請、則必沒雖然是舉也非張侯啓其端則無以始非愈能任
沾以効其力則無以終尊信之者易於為言以相之則又本乎
師之感格之神也愈號藍江沾號澤山云至正五年十月翰林
直學士兼經筵官宋褰序

送宋子與赴官淮南序

臨江宋子與以至治癸亥來京師手書一道介其親友翰林檢
閱歐陽南陽拜先兄正獻公于私家正獻時為翰林修撰致其
所著詩文于故侍講曹文貞公中丞石田馬公今翰林承旨圭
齋歐陽公侍書博士虞公伯生挈而進之皆美其學而嗾其才
且薦之期以文顯泰定甲子奉宰相命為太學生時子與親老
未獲祿養而定省曠且監學積分試例未定嘗欲決去正獻苦
留之未有以處也會天曆間開奎章閣藝文監招延天下文士
正獻首為太監遂擢從事監中未幾正獻薨子與亦丁內艱服
闋渡至京曹馬諸公皆相繼仙去識者固少而子與以親老不

欲留中廼佐幕章貢子與喜人皆惋惜之迎養赴官不及歲親
又喪今年秋來謁選天官氏悉其賢將用烏史屬論定矣適病
疾癯頗若自念雖仕于朝亦不得挈其室家偕來又力求外補
遂授兩淮屯田府知事公御大夫士凡識者皆矍然駭曰子與
又不在館閣邪于其行也咸贈以言而屬予序之予惟子與孝
于親敏于事功行美而識明氣高邁援筆作文不苟詩句清麗
沈着痛快其才可謂全矣自至治迄今凡廿有三年而仕始至
于此謂之不偶可也然國家土宇廣遠願仕于朝者不少間以
儒進者雖顯矣而名不稱情若子與者言乎仕若有歎而其文
其行始為諸公所期中為所惋惜且駭之實可以聲音笑貌得
之乎名者造物所靳豈盛于此而劣于彼邪頌子與年強氣壯
學業日宏以肆天將用之人其舍諸予知其長轡遠馭之所至
終可以釋且惜且駭者之疑之憾而副所期者裁鑒之精又可
以實予兄知人之明之左驗也幸無諉曰豈無他人不如我同
父至正五年十月宋瑩序

送墨工魏元德序

至正五年六月庚午皇帝御慈仁殿中書右丞領宣文閣事臣
達世貼睦進魏景仁所製墨朱戶啟見錦囊啟封玄光溢目
芳香襲左右上嘉賓之勅崇文少監臣明理藏于閣命賜內帑
幣帛景仁拜辭下臣瑩是日進講亦與觀焉明年春景仁將南

歸別造新墨以獻大夫賦歌詩贈之予序其事始景仁來京師
三年館閣諸臣方被命修三史開局聞景仁墨善雜出他墨作
字列試之以定優劣其色瑩而凝透蠟紙背其品少亞于古今
工皆退舍於是爭售用以畢史事及好古名能鑒裁者徃市
為文府珍玩嗚呼墨小物也景仁布衣也上被恩寵下收善價
其伎之精有足以動人者如是夫子夏曰雖小道必有可觀者
焉然吾嘗閱比年醫卜百工技藝挾其能遊京師者始焉竭其
才精其術以覲有所遇既遇矣志驕心怠則業荒驕則譽喪
悲夫景仁之行當益邇考古法叢美劑工製作以報稱際遇而
重獻之則其所獲又不止是彼驕怠者將有所警矣景仁字元

德大名人世其業于上饒之王山至正六年正月翰林直學士
兼經筵官宋瑩序

燕石集卷第十三

雜著

災異封事

至元三年丁丑

監察御史臣宋褰伏惟天心仁愛人君凡災異之見所以示警
戒也人君畏懼必脩德以答天意然後久安長治享祚無疆此
有國之常經古今之通義也我國家承平百年有餘列聖臨御
未嘗不兢惕畏天故至今日皇上即位以來垂衣拱手未有過
舉然而一歲之內日月薄蝕星文垂象洪水為患闕前火災又
自八月十四日夜京城地震自夜達旦連日不定太廟前殿一
室墻圮神靈震驚其餘官廨民居間有毀塌蓋京師天子所

居宗廟社稷所在是以民心皇上下憂恐災異迭見萃于此時豈國政猶有所未修民瘼猶有所未愈以致然歟理宜奏聞集議講求弭災之道務求實惠不尚虛文然後可以上答天譴下遂民生伏望陛下留心修省早回聖駕不勝幸甚

建言救荒至元四年戊寅按部京畿東道

竊見擅順通薊等處去歲夏秋霖雨及溪河泛漲滄沒田禾十損八九已蒙上司累次查驗卑職亦嘗親詣被災鄉村一體覆除另行外所至之處人民告訴百端生受情狀可傷饑寒藍縷不能存活強壯者猶能趁逐微細生理日求升合老弱無依之民掃棟稗穀以粥飲度日未蒙賑恤極被擾害蓋緣鷹坊牧

馬并各技兒怯憐人口等指稱昔寶赤為名騎坐馬匹懸帶弓箭苦械動輒三五十人結成群黨間有攜帶家小隨處住坐旬日又復他往須索酒飯鷹食等物州縣官吏不能辨其真偽畏威懼勢尚被凌虐不能支撐未免齋歛已是不堪猶且未能充其所欲故意徧徃鄉村店舍害及貧窮被災之民自給不暇縱有一二溫飽之家百般被其騷擾雞豬口糧為所搜奪若從其所欲則無辜之民其小蓄積不能一一應付稍或推阻訴難輒便吊縛打拷重者殘害肢體性命或男子懸避逃匿又行凌辱妻女被害之民亦知州縣官司不能禁治無所申訴往往折毀門戶拋棄菴廬全家流移逃避冤愁若楚去住兩難嘗聞國以

民為本民以食為天今者歲且荐飢民將胥斃為人臣子理宜深憂痛念有生之民皆吾皇朝赤子性命衣食無非感戴國恩然果因差發稅糧征戍屯衛等事為國損軀碎骨分所當為今縱此曹竊圍獵之名逞戕害之事政使善良倒懸黎庶驚駭不能聊生民之疾苦莫此為甚致傷和氣實由於斯若漫飛放之出百姓何以支持卑職忝居言路安忍視為泛常目所親覩不敢負國即日春首飢民救死不贍如蒙憲臺具呈都省設法禁治獲民之弊其貧乏之民仍加賑恤俾遂生全誠國家之大幸

劉靜修改封謚陞祀文

竊惟道之大原出於天弘之則存乎人克舜禹湯文武周公孔子心法相授統緒相承自茲以降漢唐歷代名儒宋九先生我元朝許文正公皆以得其正傳故陞祀孔子廟庭實為尊崇賢哲啓迪世教之大義也伏見故集賢學士嘉議大夫贈翰林學士資德大夫上護軍追封容城郡公謚文靖劉因以天挺英邁之姿廓自得正大之學負浩然之氣真知力行崇高尚之志清修苦節其言論則主乎大經大法其念慮則存乎致君澤民傳注有功出處合義夷考盛德克配前人如蒙上聞崇祀賢廡不惟彰我朝有大賢之才接道統之正抑且表聖上崇儒重道興起斯文之心又且爵封容城郡公謚曰文靖容城乃保定一縣即非郡國以靖配文義若未稱宜遂合于部分太常禮官改議封

謚相應

宋高宗帝紀論 時為國子司業預修宋史

史臣曰甚矣高宗之不幸也君於衰亂之餘時危勢迫兵弱財匱敵兵歲擾播越窮僻重以苗劉群盜之亂其立國確乎艱哉世美其能 祖宗不妄殺至禁用翠羽鹿胎澤及物類寬慈仁厚宜若可稱然以李綱趙鼎張浚終于竄斥岳飛父子寃死于大功垂成良由數窘兵難魂怵魄駭餌賊檜和議耳不絕口顧崇其功任以威權刑賞黜陟反聽其命是以忘親忍恥怙墮畏懦境上不沒獲罪當 悲夫

太古字說

監察御史高昌拜住字太古日與余聯事諗予曰朋友命以字舊矣君文人幸衍其義教我予辭曰予不啻不文且有疑焉太古當泰定初正秘書監予嘗備員典校時相先後未始識其人然聞公卿大夫士交口薦譽者十有五年矣其言曰太古不崖岸不畦畛不陷穽機巧真淳樸茂洞達樂易者今乃識其人服用冠佩車馬室屋殊非洪荒之世大庭赫胥之民無標枝野鹿之態或者哂曰子文人也論人以心乎頌以迹乎不崖岸不畦畛不陷穽機巧真淳樸茂洞達樂易者為今人乎為古人乎予歛衽嘆服其言之能釋予疑遂志之為太古字說

趙宗吉真贊

名承禧至順元年進士由翰林編修辟御史臺掾平陽人

睥然者容屹然者躬縝粟其外淵沉其中負汾晉之勁氣振章
逢之高風固嘗效編摩著作之力又豈不足建臺閣廊廟之功
此所謂觀其德符而可以體其道克者耶

丑的子元身冠像讚

彼美一人佩服惟寅凜冰霜兮冲抱若將批乎逆鱗貌温而恂
恂氣肅而閎：山立兮揚休正笏兮垂紳是盖嘗始命而攬轡
于秦隴滇蜀再出而按部于楚粵甌閩者也揚振洪綱趨拜紫
宸諫遊幸于春蒐備顧問于時巡其所以守正持平蘊秀含淳
者固基于父兄門地培植之厚仍重以詩書禮樂浸灌之純使
人望之足以摧姦慝化獷鷲又何必規：然陪邪觸佞然後稱

劉介之臣德潤乎身澤加于民臺閣雍容高步遐振乃知是丹
青之筆所以權輿乎黃髮兒齒之生面于麒麟也

司齊民畫讚

名稱平原人由蓬萊尹為山南憲司知事年六十八

氣充兮色愉神肅兮貌耀表風儀之深觀豁表素之崎嶇是盖
孕靈于濟岱之境務本乎青齊之區然後致臺閣歷練之明達
脫郡縣奔走之勤劬所以垂裕子孫藏富田廬者乃福澤培養
之厚豈屑：于法令簿書者乎贊我誌諏強力有餘方將收之
桑榆而奮翼遽可以告老而懸車也邪

御書和齋讚

裕皇出閣世祖命太子贊 臣王岫侍講讀東宮裕皇所習字

書凡六七幅皆如家塾常式署御名髹積金滕中秘嚴秘臣典
校時獲欽觀之逮仁廟聖慈每獎論臣下進階官御批付中書
手筆莫不錦標玉軸珍藏于家後至元己卯臣叨恩司臬山南
中興守臣阿合馬出示今天子御書和齋二字筆意雄渾布置
端嚴日星炳明風霆鼓動雖聖學天成祖宗崇文之所自也謹
拜手稽首而述贊曰於赫我皇睿知天資聖明文物時出用之
維昔東陵暫駐六飛貳守陪扈敬恭奉持帝嘉乃心寵錫宸翰
昭回穆清其光有爛奎耀于躔虹彩是貫飛白鄙唐題劔陋漢
聖祖崛起龍朔洪荒列聖尚文中外寶藏我皇緝熙列聖有光
臣聚作贊式叙天章

淮東會憲耿彥起畫贊

名汝霖京師人

目炯兮顧高氣肅兮神韜有莪者冠
粲其袍所以躋華顯于
昭代寔兆乎孕清淑于神臯善澤涵濡文教薰陶載瞻風儀明
監莫逃唯周慎可以立勛業唯峭厲可以懾貪饕然後允協乎
秋霜烈日之義邀矣夫五三輔之豪謂宜騁羈韉于駘騰歷
廊廟而遊遨慨屢持於憲節殫六轡之賢勞繫刺促乎憂民致
駸尋于二毛福祉之至川流滔：吾將遲老成之徵用邇可嘆
不遭也耶

帖木耳不華象冠像讚

字仲彬今湖南監憲

凝然其軀炯然其臚貌古而容舒氣肅而神愉是為中朝鐵面

御史之圖和粹深潛謹厚安徐坦襟度之無間恢材畧今有餘
知之者識其為莘黷之族不知者以為欲然退讓之儒我有夙
好翱翔宦途出則並駕坐則聯裾知之深而敬之篤故能摹寫
其萬一庶可以敦乎薄夫

清敏齋銘

山南憲司經歷散竹仲文之號

振：幕賓顏扁昭示儆戒無窮稱述有謂貪墨由濁懦不立
志清心潔身敏以集事倚與休哉顧誕勿替

祭文

誠夫兄大殮畢祭文

維元統二年歲次甲戌十一月二十九日癸丑弟翰林修撰聚

謹以少牢之奠致祭于亡兄集賢直學士國子祭酒誠夫公之
靈於惟顯考生我弟兄弟同胞五人厥幼為聚弱不就傳實受學
兄謂材可教變化昏鴛十四而孤俾不廢業流離南土同飢同
寒稍長及冠侍客浚都艱苦跋涉靡遑寧處道蔡淮江邊覲南
中同事筆研為舉子業母氏棄養同還京師兄魁文場我戰弗
利劇淬舟鼓忝預末科同任王朝于今十稔妻孥同饜迄無間
言聚生卅年獨共兄久暫違之日十僅二三方期樂康擬倫椿
津皇天后土乃遽奪去 離弗堪遂成死別邈哉音容不同斯
世嗚呼哀哉其痛如何載惟我兄孝親忠君學古而文剛廉介
直之人之德之志之學弗仲弗寃僅止于斯嗚呼哀哉其痛如

何今茲之辰歛藏五体柏棺杉柳敢曰無忤幽冥異途不可復
見割牲陳奠式薦哀誠嗚呼哀哉同胞五人厥幼為聚物故者
四惟聚獨存其痛如何尚饗

祭中書左丞王儀伯文

維年月日國子監丞張彝戶部員外郎王守誠翰林修撰宋聚
應奉塔不台程謙典籍諳都樂濱州同知伯顏大樂署令伯顏
謹以牲酒之奠致祭于故中書左丞王公之靈於維我公天挺
英時氣邁學醇才副厥德劉方閨朗誡篤淵塞蔚為儒宗佐我
邦國受知明聖崇登峻陟典郡仁惠贊政忠直善良我知險士
我聖群疑衆難剖辨極力古今事物源委得毫末洞見陳說

不息暫居侍從謹論肯默開示士子講問戒飭諄々面命貌温
可即耽嗜經史樸素服食不矜不逸小心翼翼、猷為述作器量
鑒識靡一不善昭示典則嗚呼哀哉明哲之資承弼之職瞻仰
之重信任之重耆六十而薨畜憾在臆朝著卿士驚惋愴惻我等
小我情曷可抑甲子廷對庸菲愧愜公位 天子有勅公預
讀卷品第無惑載沐教誨均被培植疾革憂疑訃至痛盡聚首
披淚阻于匍匐敬致牲酒託祭墓側式薦哀誠傷悼何極

祭帖木耳卜華大夫文 為御史時作

維至元四年九月壬戌朔越十一日壬申御史中丞某等謹遣
監察御史劉承祖以少牢之奠致祭于故御史大夫帖木耳卜

華公之墓惟公稟靈穆清襲慶忠良臣隣之資邦家之光德粹而厚貌恭而莊儀刑山嶽聞望珪璋禮儀詩書教化綱常遜志于學大業昭彰動止有法言笑不妄却遠華侈冲虛自將素位富貴驕奢不萌列聖股肱任重力強式副眷注弼諧謨明愷任小人我則力戡直清公忠載揚殫歷百僚師表四方主持國是振舉憲綱功在王室論協贊襄令德令儀不替以爽嘉謀嘉猷致君虞唐謂宜耆艾遐福熾昌謂宜紳笏磐石棟梁云胡遘疾淹延竟亡國誅殄瘁哀表悼傷矧在同列痛心惶々弗克予哭寃宥之藏馳情官次遣祭墓傍有俎肉崇有酌者觴邈以將意涕泗惟滂嗚呼哀哉尚饗

省墓祭考妣文

維至元四年歲次戊寅十一月辛酉朔越三十日庚寅孝子監丞御史掣謹以牲酒之奠敢昭告于顯考安仁縣尹贈嘉議大夫戶部尚書上輕車都尉范陽郡侯府君顯妣范陽郡夫人李氏之靈伏以生育之恩昊天罔極日月不居棄養逾世繫縻于官籍違逝先壟久缺汛掃負罪幽明臨來茲適值遠祥敬陳菲薦不勝哀慕尚饗

祭二先兄四先兄文

維年月日弟掣謹以牲酒之奠敢昭告于先兄道州學正弘夫息州稅務都監達夫之靈茲以王事未荆展省先壟祔祭于位

不勝哀感尚饗

祭謝揆齋文

維至元正年歲次辛巳八月丙午朔越四日己酉翰林待制宋
鑾謹以柔毛酒酌之奠致祭于翰林直學士贈國子祭酒文安
謝公之靈而言曰惟公之生天性卓然正學既明多藝且賢聰
悟匪常聞見實繁讀書則五行俱下義理隨解作文則縱橫
出入倚馬萬言人見其文章議論之浩瀚孰測其抱負蘊畜之
淵源百氏混覽易道獨玄其知默守豈徒窮研故始筮任而佐
牧已澤及乎民物累拜命于館閣闡人教之昭宣敷議政于大
廷凜操守之獨堅苟委寄以重任邈宦業之可觀何蒼之之莫
測倏痛惜于逝川嗚呼哀哉竟不少延始予羈卯公始加冠從
我獻正與公周旋棲遲嘯傲荆楚往還予壯公老同立朝班交
久情密與同悲歡居則席接出則轡聯評議則臆見多協辯論
則膾合不偏譏謔笑怒肆其瀾翻不少芥蒂灼其肺肝公之交
予序齒則懸尚論鄉井公蜀我燕始終無間禮義不訾予或略
其兄事之禮公亦謬以為才浚而相憐我知公深不苛不煩進
退以義知命樂天汪洋若陂性宜佩絃有所制作厥思綿之操
觚遺文力追古先辭旨微直風氣渾全其未也滔之江漢之波
其成也崑之嵩岱之山流麗乎短章揚侈乎大篇黼藻典冊筆
削簡編粲烜赫于當代示來哲于不刊悼斯文之不幸慨不作

于先京嗚呼哀哉竟不少延前歲之別予已惡年命之週于甲子
今則薨逝僅加一年始聞病疽驚怛不安當公壽旦聞訃哀樊
由荆而秦予縻於官一酌臯緩罪莫自寬赴召禁林艤舟江干
割牲醢酒于公新阡宿草不哭禮經有傳朋友大義予豈無權
思公之切晝夜不捐今茲猶寄書于地下未以為永訣于重泉
公貌莫觀魂庶可還旋音聲淚俱下公其聞焉尚饗

燕石集卷第十三終